

說郛

正

一

特  
曾12  
6  
3



112  
6  
3



說郭目錄

身第一

大學石經 補

大學古本 補

中庸古本 補

詩小序 上商

詩傳 端木賜

詩說 申培

天台陶宗儀九成纂

說郭目錄



大學石經

古本

大學之道在明明德在親民在止於至善古之欲明  
明德於天下者先治其國欲治其國者先齊其家欲  
齊其家者先修其身欲修其身者先正其心欲正其  
心者先誠其意欲誠其意者先致其知致知在格物  
物有本末事有終始知所先后則近道矣詩云緝蠻  
黃鳥止于丘隅子曰於止知其所止可以人而不如  
鳥乎知止而后有定定而后能靜靜而后能安安而



后能慮慮而后能得詩云邦畿千里惟民所止子曰  
聽訟吾猶人也必也使無訟乎無情者不得盡其辭  
大畏民志此謂知本自天子以至於庶人壹是皆以  
修身爲本其本亂而未治者否矣其所厚者薄而其  
所薄者厚未之有也此謂知本此謂知之至也物格  
而后知至知至而后意誠意誠而后心正心正而后  
身修身修而后家齊家齊而后國治國治而后天下  
平所謂誠其意者毋自欺也如惡惡臭如好好色此  
之謂自謙故君子必慎其獨也小人閒居爲不善無

所不至見君子而后厭然揜其不善而著其善人之  
視已如見其肺肝然則何益矣此謂誠於中形於外  
故君子必慎其獨也曾子曰十目所視十手所指其  
嚴乎富潤屋德潤身心廣體胖故君子必誠其意所  
謂修身在正其心者身有所忿懣則不得其正有所  
恐懼則不得其正有所好樂則不得其正有所憂患  
則不得其正心不在焉視而不見聽而不聞食而不  
知其味顏淵問仁子曰非禮勿視非禮勿聽非禮勿  
言非禮勿動此謂修身在正其心所謂齊其家在修

大學不終  
其身者人之其所親愛而辟焉之其所賤惡而辟焉  
之其所畏敬而辟焉之其所哀矜而辟焉之其所敖  
惰而辟焉故好而知其惡惡而知其美者天下鮮矣  
故諺有之曰人莫知其子之惡莫知其苗之碩此謂  
身不修不可以齊其家所謂治國必先齊其家者其  
家不可教而能教人者無之故君子不出家而成教  
於國孝者所以事君也弟者所以事長也慈者所以  
使衆也一家仁一國興仁一家讓一國興讓一人貪  
戾一國作亂其機如此此謂一言僨事一人定國康

誥曰如保赤子心誠求之雖不中不遠矣未有學養  
子而后嫁者也故治國在齊其家詩云桃之天天其  
葉蓁蓁之子于歸宜其家人宜其家人而后可以教  
國人詩云宜兄宜弟宜兄宜弟而后可以教國人詩  
云其儀不忒正是四國其爲父子兄弟足法而后民  
法之也此謂治國在齊其家所謂平天下在治其國  
者上老老而民興孝上長長而民興弟上恤孤而民  
不倍是以君子有絜矩之道也所惡於上母以使下  
所惡於下母以事上所惡於前母以先後所惡於後

母以從前所惡於右母以交於左所惡於左母以交於右此之謂絜矩之道詩云樂只君子民之父母民之所好好之民之所惡惡之此之謂民之父母秦誓曰若有一个臣斷斷兮無他技其心休休焉其如有容焉人之有技若已有人之彥聖其心好之不啻若自其口出實能容之以能保我子孫黎民尚亦有利哉人之有技媚疾以惡之人之彥聖而違之俾不通實不以不能保我子孫黎民亦曰殆哉唯仁人故

進諸四夷不與同中國此謂唯仁人爲能

愛人能惡人見賢而不能舉舉而不能先命也見不善而不能退退而不能遠過也好人之所惡惡人之所好是謂拂人之性菑必逮夫身詩云節彼南山維石巖巖赫赫師尹民具爾瞻有國者不可以不慎辟則爲天下僂矣是故君子先慎乎德有德此有人有人此有土有土此有財有財此有用德者本也財者末也外本內末爭民施奪是故財聚則民散財散則民聚詩云殷之未喪師克配上帝儀監于殷峻命不易道得衆則得國失衆則失國楚書曰楚國無以爲

寶惟善以爲寶是故言悖而出者亦悖而入貨悖而入者亦悖而出康誥曰惟命不于常道善則得之不善則失之矣舅犯曰亡人無以爲寶仁親以爲寶仁者以財發身不仁者以身發財未有好仁而下不好義者也未有好義其事不終者也未有府庫財非其財者也生財有大道生之者衆食之者寡爲之者疾用之者舒則財恒足矣孟獻子曰畜馬乘不察於雞豚伐兵之家不畜牛羊百乘之家不畜聚斂之臣與其有聚斂之臣寧有盜臣此謂國不以利爲利以

義爲利也長國家而務財用者必自小人矣彼爲善之小人之使爲國家菑害並至雖有善者亦無如之何矣此謂國不以利爲利以義爲利也是故君子有大道必忠信以得之驕泰以失之堯舜帥天下以仁而民從之桀紂帥天下以暴而民從之其所令反其所好而民不從是故君子有諸已而后求諸人無諸已而后非諸人所藏乎身不恕而能喻諸人者未之有也康誥曰克明德太甲曰顧諟天之明命帝典曰克明峻德皆自明也湯之盤銘曰苟日新日日新又

日新康誥曰作新民詩曰周雖舊邦其命維新是故君子無所不用其極詩云穆穆文王於緝熙敬止爲人君止於仁爲人臣止於敬爲人子止於孝爲人父止於慈與國人交止於信詩云瞻彼淇澳棗竹猗猗有斐君子如切如磋如琢如磨瑟兮僖兮赫兮喧兮有斐君子終不可喧兮如切如磋者道學也如琢如磨者自修也瑟兮僖兮者恂慄也赫兮喧兮者威儀也有斐君子終不可喧兮者道盛德至善民之不能忘也詩云於戲前王不忘君子賢其賢而親其親小人樂其樂而利其利此以沒世不忘也



大學古本

陶宗儀錄

大學之道在明明德在親民在止於至善知止而后  
有定定而后能靜靜而后能安安而后能慮慮而后  
能得物有本末事有終始知所先後則近道矣古之  
欲明明德於天下者先治其國欲治其國者先齊其  
家欲齊其家者先修其身欲修其身者先正其心欲  
正其心者先誠其意欲誠其意者先致其知致知在  
格物物格而后知至知至而后意誠意誠而后心正

大學古本

心正而后身修身修而后家齊家齊而后國治國治而后天下平自天子以至於庶人壹是皆以修身爲本其本亂而未治者否矣其所厚者薄而其所薄者厚未之有也此謂知本此謂知之至也所謂誠其意者毋自欺也如惡惡臭如好好色此之謂自謙故君子必慎其獨也小人閒居爲不善無所不至見君子而后厭然揜其不善而著其善人之視已如見其跣肝然則何益矣此謂誠於中形於外故君子必慎其獨也曾子曰十目所視十手所指其嚴乎富潤屋德

潤身心廣體胖故君子必誠其意詩云瞻彼淇澳棗竹猗猗有斐君子如切如磋如琢如磨瑟兮僖兮赫兮喧兮有斐君子終不可諠兮如切如磋者道學也如琢如磨者自修也瑟兮僖兮者恂慄也赫兮喧兮者威儀也有斐君子終不可諠兮者道盛德至善民之不能忘也詩云於戲前王不忘君子賢其賢而親其親小人樂其樂而利其利此以沒世不忘也康誥曰克明德太甲曰顧諟天之明命帝典曰克明峻德皆自明也湯之盤銘曰苟日新日日新又日新康誥

曰作新民詩云周雖舊邦其命維新是故君子無所不用其極詩云邦畿千里維民所止詩云緡蠻黃鳥止于丘隅子曰於止知其所止可以人而不如鳥乎詩云穆穆文王於緡熙敬止爲人君止於仁爲人臣止於敬爲人子止於孝爲人父止於慈與國人交止於信子曰聽訟吾猶人也必也使無訟乎無情者不得盡其辭大畏民志此謂知本所謂修身在正其心者身有所忿懣則不得其正有所恐懼則不得其正有所好樂則不得其正有所憂患則不得其正心不

在焉視而不見聽而不聞食而不知其味此謂修身在正其心所謂齊其家在修其身者人之其所親愛而辟焉之其所賤惡而辟焉之其所畏敬而辟焉之其所哀矜而辟焉之其所敖惰而辟焉故好而知其惡惡而知其美者天下鮮矣故諺有之曰人莫知其子之惡莫知其苗之碩此謂身不修不可以齊其家所謂治國必先齊其家者其家不可教而能教人者無之故君子不出家而成教於國孝者所以事君也弟者所以事長也慈者所以使衆也康誥曰如保赤

大學古本  
子心誠求之雖不中不遠矣未有學養子而后嫁者  
也一家仁一國興仁一家讓一國興讓一人貪戾一  
國作亂其機如此此謂一言僨事一人定國堯舜帥  
天下以仁而民從之桀紂帥天下以暴而民從之其  
所令反其所好而民不從是故君子有諸已而后求  
諸人無諸已而后非諸人所藏乎身不恕而能喻諸  
人者未之有也故治國在齊其家詩云桃之天天其  
葉蓁蓁之子于歸宜其家人宜其家人而后可以教  
國人詩云宜兄宜弟宜兄宜弟而后可以教國人詩

云其儀不忒正是四國其爲父子兄弟足法而后民  
法之也此謂治國在齊其家所謂平天下在治其國  
者上老老而民興孝上長長而民興弟上恤孤而民  
不倍是以君子有絜矩之道也所惡於上毋以使下  
所惡於下毋以事上所惡於前毋以先後所惡於後  
毋以從前所惡於右毋以交於左所惡於左毋以交  
於右此之謂絜矩之道詩云樂只君子民之父母民  
之所好好之民之所惡惡之此之謂民之父母詩云  
節彼南山維石巖巖赫赫師尹民具爾瞻有國者不

大學古本  
可以不慎辟則爲天下僂矣詩云殷之未喪師克配上帝儀監于殷峻命不易道得衆則得國失衆則失國是故君子先慎乎德有德此有人有人此有土有土此有財有財此有用德者本也財者末也外本內末爭民施奪是故財聚則民散財散則民聚是故言悖而出者亦悖而入貨悖而入者亦悖而出康誥曰惟命不于常道善則得之不善則失之矣楚書曰楚國無以爲寶惟善以爲寶舅犯曰亡人無以爲寶仁親以爲寶秦誓曰若有一个臣斷斷兮無他技其心

休休焉其如有容焉人之有技若己有之人之彥聖其心好之不啻若自其口出寔能容之以能保我子孫黎民尚亦有利哉人之有技媚疾以惡之人之彥聖而違之俾不通寔不能容以不能保我子孫黎民亦曰殆哉惟仁人放流之送諸四夷不與同中國此謂唯仁人爲能愛人能惡人見賢而不能舉舉而不能先命也見不善而不能退退而不能遠過也好人之所惡惡人之所好是謂拂人之性菑必逮夫身是故君子有大道必忠信以得之驕泰以失之生財有

大道生之者衆食之者寡爲之者疾用之者舒則財恒足矣仁者以財發身不仁者以身發財未有好上好仁而下不好義者也未有好義其事不終者也未有府庫財非其財者也孟獻子曰畜馬乘不察於雞豚伐冰之家不畜牛羊百乘之家不畜聚斂之臣與其有聚斂之臣寧有盜臣此謂國不以利爲利以義爲利也長國家而務財用者必自小人矣彼爲善之小人之使爲國家菑害並至雖有善者亦無如之何矣此謂國不以利爲利以義爲利也

終

中庸古本

陶宗儀錄

天命之謂性率性之謂道修道之謂教道也者不可須臾離也可離非道也是故君子戒慎乎其所不睹恐懼乎其所不聞莫見乎隱莫顯乎微故君子慎其獨也喜怒哀樂之未發謂之中發而皆中節謂之和中也者天下之大本也和也者天下之達道也致中和天地位焉萬物育焉仲尼曰君子中庸小人反中庸君子之中庸也君子而時中小人之中庸也小人

中庸古本  
而無忌憚也子曰中庸其至矣乎民鮮能久矣子曰  
道之不行也我知之矣知者過之愚者不及也道之  
不明也我知之矣賢者過之不肖者不及也人莫不  
飲食也鮮能知味也子曰道其不行矣夫子曰舜其  
大知也與舜好問而好察邇言隱惡而揚善執其兩  
端用其中於民其斯以爲舜乎子曰人皆曰予知驅  
而納諸罟獲陷阱之中而莫之知辟也人皆曰予知  
擇乎中庸而不能期月守也子曰回之爲人也擇乎  
中庸得一善則拳拳服膺而弗失之矣子曰天下國

家可均也爵祿可辭也白刃可蹈也中庸不可能也  
子路問強子曰南方之強與北方之強與抑而強與  
寬柔以教不報無道南方之強也君子居之衽金革  
死而不厭北方之強也而強者居之故君子和而不  
流強哉矯中立而不倚強哉矯國有道不變塞焉強  
哉矯國無道至死不變強哉矯子曰素隱行怪後世  
有述焉吾弗爲之矣君子遵道而行半塗而廢吾弗  
能已矣君子依乎中庸遯世不見知而不悔唯聖者  
能之君子之道費而隱夫婦之愚可以與知焉及其

中庸古本  
至也雖聖人亦有所不知焉夫婦之不肖可以能行  
焉及其至也雖聖人亦有所不能焉天地之大也人  
猶有所憾故君子語大天下莫能載焉語小天下莫  
能破焉詩云鳶飛戾天魚躍于淵言其上下察也君  
子之道造端乎夫婦及其至也察乎天地子曰道不  
遠人人之爲道而遠人不可以爲道詩云伐柯伐柯  
其則不遠執柯以伐柯睨而視之猶以爲遠故君子  
以人治人改而止忠恕違道不遠施諸已而不願亦  
勿施於人君子之道四丘未能一焉所求乎子以事

父未能也所求乎臣以事君未能也所求乎弟以事  
兄未能也所求乎朋友先施之未能也庸德之行庸  
言之謹有所不足不敢不勉有餘不敢盡言願行行  
願言君子胡不慥慥爾君子素其位而行不願乎其  
外素富貴行乎富貴素貧賤行乎貧賤素夷狄行乎  
夷狄素患難行乎患難君子無入而不自得焉在上  
位不陵下在下位不援上正己而不求於人則無怨  
上不怨天下不尤人故君子居易以俟命小人行險  
以徼幸子曰射有似乎君子失諸正鵠反求諸其身



中庸古本  
君子之道辟如行遠必自邇辟如登高必自卑詩曰  
妻子好合如鼓瑟琴兄弟既翕和樂且耽宜爾室家  
樂爾妻孥子曰父母其順矣乎子曰鬼神之爲德其  
盛矣乎視之而弗見聽之而弗聞體物而不可遺使  
天下之人齊明盛服以承祭祀洋洋乎如在其上如  
在其左右詩曰神之格思不可度思矧可射思夫微  
之顯誠之不可揜如此夫子曰舜其大孝也與德爲  
聖人尊爲天子富有四海之內宗廟饗之子孫保之  
故大德必得其位必得其祿必得其名必得其壽故

天之生物必因其材而篤焉故栽者培之傾者覆之  
詩曰嘉樂君子憲憲令德宜民宜人受祿于天保佑  
命之自天申之故大德者必受命子曰無憂者其惟  
文王乎以王季爲父以武王爲子父作之子述之武  
王纘太王王季文王之緒壹戎衣而有天下身不失  
天下之顯名尊爲天子富有四海之內宗廟饗之子  
孫保之武王末受命周公成文武之德追王太王王  
季上祀先公以天子之禮斯禮也達乎諸侯大夫及  
士庶人父爲大夫子爲士葬以大夫祭以士父爲士

子爲大夫葬以士祭以大夫期之喪達乎大夫三年之喪達乎天子父母之喪無貴賤一也子曰武王周公其達孝矣乎夫孝者善繼人之志善述人之事者也春秋修其祖廟陳其宗器設其裳衣薦其時食宗廟之禮所以序昭穆也序爵所以辨貴賤也序事所以辨賢也旅酬下爲上所以達賤也燕毛所以序齒也踐其位行其禮奏其樂敬其所尊愛其所親事死如事生事亡如事存孝之至也郊社之禮所以事上帝也宗廟之禮所以祀乎其先也明乎郊社之禮禘

嘗之義治國其如示諸掌乎哀公問政子曰文武之政布在方策其人存則其政舉其人亡則其政息人道敏政地道敏樹夫政也者蒲盧也故爲政在人取人以身修身以道修道以仁仁者人也親親爲大義者宜也尊賢爲大親親之殺尊賢之等禮所生也在下位不獲乎上民不可得而治矣故君子不可以不修身思修身不可以不事親思事親不可以不知人思知人不可以不知天天下之達道五所以行之者三曰君臣也父子也夫婦也昆弟也朋友之交也五

者天下之達道也知仁勇三者天下之達德也所以行之者一也或生而知之或學而知之或困而知之及其知之一也或安而行之或利而行之或勉強而行之及其成功一也子曰好學近乎知力行近乎仁知耻近乎勇知斯三者則知所以修身知所以修身則知所以治人知所以治人則知所以治天下國家矣凡爲天下國家有九經曰修身也尊賢也親親也敬大臣也體羣臣也子庶民也來百工也柔遠人也懷諸侯也修身則道立尊賢則不惑親親則諸父昆

弟不怨敬大臣則不眩體羣臣則士之報禮重子庶民則百姓勸來百工則財用足柔遠人則四方歸之懷諸侯則天下畏之齊明盛服非禮不動所以修身也去讒遠色賤貨而貴德所以勸賢也尊其位重其祿同其好惡所以勸親親也官盛任使所以勸大臣也忠信重祿所以勸士也時使薄斂所以勸百姓也日省月試旣廩稱事所以勸百工也送往迎來嘉善而矜不能所以柔遠人也繼絕世舉廢國治亂持危朝聘以時厚往而薄來所以懷諸侯也凡爲天下國

家有九經所以行之者一也凡事豫則立不豫則廢言前定則不跲事前定則不困行前定則不疚道前定則不窮在下位不獲乎上民不可得而治矣獲乎上有道不信乎朋友不獲乎上矣信乎朋友有道不順乎親不信乎朋友矣順乎親有道反諸身不誠不順乎親矣誠身有道不明乎善不誠乎身矣誠者天之道也誠之者人之道也誠者不勉而中不思而得從容中道聖人也誠之者擇善而固執之者也博學之審問之慎思之明辨之篤行之有弗學學之弗能

弗措也有弗問問之弗知弗措也有弗思思之弗得弗措也有弗辨辨之弗明弗措也有弗行行之弗篤弗措也人一能之己百之人十能之己千之果能此道矣雖愚必明雖柔必強自誠明謂之性自明誠謂之教誠則明矣明則誠矣唯天下至誠爲能盡其性能盡其性則能盡人之性能盡人之性則能盡物之性能盡物之性則可以贊天地之化育可以贊天地之化育則可以與天地參矣其次致曲曲能有誠誠則形形則著著則明明則動動則變變則化唯天下

中庸古本  
至誠爲能化至誠之道可以前知國家將興必有禎  
祥國家將亡必有妖孽見乎著龜動乎四體禍福將  
至善必先知之不善必先知之故至誠如神誠者自  
成也而道自道也誠者物之終始不誠無物是故君  
子誠之爲貴誠者非自成已而已也所以成物也成  
已仁也成物知也性之德也合外內之道也故時措  
之宜也故至誠無息不息則久久則徵徵則悠遠悠  
遠則博厚博厚則高明博厚所以載物也高明所以  
覆物也悠久所以成物也博厚配地高明配天悠久

無疆如此者不見而章不動而變無爲而成天地之  
道可一言而盡也其爲物不貳則其生物不測天地  
之道博也厚也高也明也悠也久也今夫天斯昭昭  
之多及其無窮也日月星辰繫焉萬物覆焉今夫地  
一撮土之多及其廣厚載華岳而不重振河海而不  
洩萬物載焉今夫山一卷石之多及其廣大草木生  
之禽獸居之寶藏興焉今夫水一勺之多及其不測  
鼉鼉蛟龍魚鼈生焉貨財殖焉詩云維天之命於穆  
不已蓋曰天之所以爲天也於乎不顯文王之德之

純蓋曰文王之所以爲文也純亦不已大哉聖人之道洋洋乎發育萬物峻極于天優優大哉禮儀三百威儀三千待其人而後行故曰苟不至德至道不凝焉故君子尊德性而道問學致廣大而盡精微極高明而道中庸溫故而知新敦厚以崇禮是故居上不驕爲下不倍國有道其言足以興國無道其默足以容詩曰旣明且哲以保其身其此之謂與子曰愚而好自用賤而好自專生乎今之世反古之道如此者哉及其身者也非天子不議禮不制度不考文今天

下車同軌書同文行同倫雖有其位苟無其德不敢作禮樂焉雖有其德苟無其位亦不敢作禮樂焉子曰吾說夏禮杞不足徵也吾學殷禮有宋存焉吾學周禮今用之吾從周王天下有三重焉其寡過矣乎上焉者雖善無徵無徵不信不信民弗從下焉者雖善不尊不尊不信不信民弗從故君子之道本諸身徵諸庶民考諸三王而不繆建諸天地而不悖質諸鬼神而無疑百世以俟聖人而不惑質諸鬼神而無疑知天也百世以俟聖人而不惑知人也是故君子

動而世爲天下道行而世爲天下法言而世爲天下  
則遠之則有望近之則不厭詩曰在彼無惡在此無  
射庶幾夙夜以永終譽君子未有不如此而蚤有譽  
於天下者也仲尼祖述堯舜憲章文武上律天時下  
襲水土辟如天地之無不持載無不覆幬辟如四時  
之錯行如日月之代明萬物並育而不相害道並行  
而不相悖小德川流大德敦化此天地之所以爲大  
也唯天下至聖爲能聰明睿知足以有臨也寬裕溫  
柔足以有容也發強剛毅足以有執也齊莊中正足

以有敬也文理密察足以有別也溥博淵泉而時出  
之溥博如天淵泉如淵見而民莫不敬言而民莫不  
信行而民莫不說是以聲名洋溢乎中國施及蠻貊  
舟車所至人力所通天之所覆地之所載日月所照  
霜露所隊凡有血氣者莫不尊親故曰配天唯天下  
至誠爲能經綸天下之大經立天下之大本知天地  
之化育夫焉有所倚肫肫其仁淵淵其淵浩浩其天  
苟不固聰明聖知達天德者其孰能知之詩曰衣錦  
尚絅惡其文之著也故君子之道闇然而日章小人

中庸古本  
之道的然而日亡君子之道淡而不厭簡而文溫而  
理知遠之近知風之自知微之顯可與入德矣詩云  
潛雖伏矣亦孔之昭故君子內省不疚無惡於志君  
子之所不可及者其唯人之所不見乎詩云相在爾  
室尚不愧于屋漏故君子不動而敬不言而信詩曰  
奏假無言時靡有爭是故君子不賞而民勸不怒而  
民威於鈇鉞詩曰不顯惟德百辟其刑之是故君子  
篤恭而天下平詩云予懷明德不大聲以色子曰聲  
色之於以化民末也詩云德輶如毛毛猶有倫上天

之載無聲無臭至矣



詩小序

衛 卜商

周南

關雎

后妃之德也風之始也所以風天下而正夫婦也故用之鄉人焉用之邦國焉風風也教也風以動之教以化之然自關雎麟趾之化王者之風故繫之周公南言化自北而南也鵲巢騶虞之德諸侯之風也先王之所以教故繫之召公周南召南正始之道王化

詩小序

之基是以關雎樂得淑女以配君子憂在進賢不淫其色哀窈窕思賢才而無傷善之心焉是關雎之義也

葛覃

后妃之本也后妃在父母家則志在于女功之事躬儉節用服澣濯之衣尊敬師傅則可以歸安父母化天下以婦道也

卷耳

后妃之志也又當輔佐君子求賢審官知臣下之勤

勞內有進賢之志而無險詖私謁之心朝夕思念至於憂勤也

樛木

后妃逮下也言能逮下而無嫉妒之心焉

螽斯

后妃子孫衆多也言若螽斯不妒忌則子孫衆多也

桃夭

后妃之所致也不妒忌則男女以正婚姻以時國無鰥民也

兔置

后妃之化也關雎之化行則莫不好德賢人衆多也

芣苢

后妃之美也和平則婦人樂有子矣

漢廣

德廣所及也文王之道被于南國美化行于江漢之域無思犯禮求而不可得也

汝墳

道化行也文王之化行乎汝墳之國婦人能閔其君

子猶勉之以正也

麟之趾

關雎之應也關雎之化行則天下無犯非禮雖衰世之公子皆信厚如麟趾之時也

召南

鵲巢

夫人之德也國君積行累功以致爵位夫人起家而居有之德如鳩鳩乃可以配焉

采芣

夫人不失職也夫人可以奉祭祀則不失職矣

草蟲

大夫妻能以禮自防也

采蘋

大夫妻能循法度也能循法度則可以承先祖共祭祀矣

甘棠

美召伯也召伯之教明于南國

行露

召伯聽訟也衰亂之俗微貞信之教興彊暴之男不能侵陵貞女也

羔羊

鵲巢之功致也召南之國化文王之政在位皆節儉正直德如羔羊也

殷其雷

勸以義也召南之大夫遠行從政不遑寧處其室家能閱其勤勞勸以義也

標有梅

詩小序  
男女及時也召南之國被文王之化男女得以及時也

小星

惠及下也夫人無妒忌之行惠及賤妾進御于君知其命有貴賤能盡其心矣

江有汜

美媵也勤而無怨嫡能悔過也文王之時江汜之間有嫡不以其媵備數媵遇勞而無怨嫡亦自悔也

野有死麇

惡無禮也天下大亂強暴相陵遂成淫風被文王之化雖當亂世爲惡無禮也

何彼穠矣

美王姬也雖則王姬亦下嫁于諸侯車服不繫其夫下王后一等猶執婦道以成肅雝之德也

騶虞

鵲巢之應也鵲巢之化行人倫旣正朝廷旣治天下純被文王之化則庶類蕃殖蒐田以時仁如騶虞則王道成也

邶

栢舟

言仁而不遇也衛頃公之時仁人不遇小人在側

綠衣

衛莊姜傷已也妾上僭夫人失位而作是詩也

燕燕

衛莊姜送歸妾也

日月

衛莊姜傷已也遭州吁之難傷已不見答于先君以

至困窮之詩也

終風

衛莊姜傷已也遭州吁之暴見侮慢而不能正也

擊鼓

怨州吁也衛州吁用兵暴亂使公孫文仲將而平陳與宋國人怨其勇而無禮也

凱風

美孝子也衛之淫風流行雖有七子之母猶不能安其室故美七子能盡其孝道以慰其母心而成其志

爾

雄雉

刺衛宣公也淫亂不恤國事軍旅數起大夫久役男女怨曠國人患之而作是詩

匏有苦葉

刺衛宣公也公與夫人並為淫亂

谷風

刺夫婦失道也衛人化其上淫于新婚而棄其舊室夫婦離絕國俗傷敗焉

式微

黎侯寓于衛其臣勸以歸也

旄丘

責衛伯也狄人追逐黎侯黎侯寓于衛衛不能修方伯連帥之職黎之臣子以責于衛也

簡兮

刺不用賢也衛之賢者仕于伶官皆可以承事王者也

泉水

詩小序

七

衛女思歸也嫁于諸侯父母終思歸寧而不得故作是詩以自見也

北門

刺仕不得志也言衛之忠臣不得其志爾

北風

刺虐也衛國並為威虐百姓不親莫不相攜持而去焉

靜女

刺時也衛君無道夫人無德

新臺

刺衛宣公也納伋之妻作新臺于河上而要之國人惡之而作是詩也

二子乘舟

思伋壽也衛宣公之二子爭相為死國人傷而思之作是詩也

鄘

柏舟

共姜自誓也衛世子共伯蚤死其妻守義父母欲奪



詩小序  
而嫁之誓而弗許故作是詩以絕之

墻有茨

衛人刺其上也公子頑通于君母國人疾之而不可道也

君子偕老

刺衛夫人也夫人淫亂失事君子之道故陳人君之德服飾之盛宜與君子偕老也

桑中

刺奔也衛之公室淫亂男女相奔至于世族在位相

竊妻妾期于幽遠政荒民流而不可止

鶉之奔奔

刺衛宣姜也衛人以為宣姜鶉鶉之不若也

定之方中

美衛文公也衛為狄所滅東徙渡河野處漕邑齊桓公攘戎狄而封之文公徙居楚丘始建城市而營宮室得其時制百姓說之國家殷富焉

輟棘

止奔也衛文公能以道化其民淫奔之恥國人不齒

也

相鼠

刺無禮也衛文公能正其羣臣而刺在位承先君之化無禮儀也

干旄

美好善也衛文公臣子多好善賢者樂告以善道也

載馳

許穆夫人作也閔其宗國顛覆自傷不能救也衛懿公為狄人所滅國人分散露于漕邑許穆夫人閔衛

之亡傷許之小力不能救思歸唁其兄又義不得故

賦是詩也

衛

淇奧

美武公之德也有文章又能聽其規諫以禮自防故能入相于周美而作是詩也

考槃

刺莊公也不能繼先公之業使賢者退而窮處

碩人

閔莊姜也莊公惑于嬖妾使驕上僭莊姜賢而不答  
終以無子國人閔而憂之

氓

刺時也宣公之時禮義消亡淫風大行男女無別遂  
相奔誘華落色衰復相棄背或乃困而自悔喪其配  
耦故序其事以風焉美反正刺淫泆也

竹竿

衛女思歸也適異國而不見答思而能以禮者也

芄蘭

刺惠公也驕而無禮大夫刺之

河廣

宋襄公母歸于衛思而不止故作是詩也

伯兮

刺時也言君子行役爲王前驅過時而不反焉

有狐

刺時也衛之男女失時喪其妃耦焉古者國有凶荒  
則殺禮而多昏會男女之無夫家者所以育人民也

木瓜

詩小序  
美齊桓公也衛國有狄人之敗出處于漕齊桓公救而封之遺之車馬器服焉衛人思之欲厚報之而作是詩也

王

黍離

閔宗周也周大夫行役至于宗周過故宗廟官室盡為禾黍閔周室之顛覆徬徨不忍去而作是詩也

君子于役

刺平王也君子行役無期度大夫思其危難以風焉

君子陽陽

閔周也君子遭亂相招為祿仕全身遠害而已

揚之水

刺平王也不撫其民而遠屯戍于母家周人怨思焉

中谷有蓷

閔周也夫婦日以衰薄凶年饑饉室家相棄爾

兔爰

閔周也桓王失信諸侯背叛構怨連禍王帥傷敗君子不樂其生焉

葛藟

王族刺平王也周室道衰棄其九族焉

采芣

懼讒也

大車

刺周大夫也禮義陵遲男女淫奔故陳古以刺今大夫不能聽男女之訟焉

丘中有麻

思賢也莊王不明賢人放逐國人思之而作是詩也

鄭

緇衣

美武公也父子並爲周司徒善于其職國人宜之故美其德以明有國善善之功焉

將仲子

刺莊公也不勝其母以害其弟弟叔失道而公弗制祭仲諫而公弗聽小不忍以致大亂焉

叔于田

刺莊公也叔處于京繕甲治兵以出于田國人說而

歸之

大叔于田

刺莊公也叔多才而好勇不義而得衆也

清人

刺文公也高克好利而不顧其君文公惡而欲遠之不能使高克將兵而禦狄于境陳其師旅翱翔河上久而不召衆散而歸高克奔陳公子素惡高克進之不以禮文公退之不以道危國亡師之本故作是詩也

羔裘

刺朝也言古之君子以風其朝焉

遵大路

思君子也莊公失道君子去之國人思望焉

女曰鷄鳴

刺不說德也陳古義以刺今不說德而好色也

有女同車

刺忽也鄭人刺忽之不昏于齊太子忽嘗有功于齊齊侯請妻之齊女賢而不取卒以無大國之助至于

見逐故國人刺之

山有扶蘇

刺忽也所美非美然

籥兮

刺忽也君弱臣疆不倡而和也

狡童

刺忽也不能與賢人圖事權臣擅命也

褰裳

思見正也狂童恣行國人思大國之正已也

丰

刺亂也昏姻之道缺陽倡而陰不和男行而女不隨

東門之墠

刺亂也男女有不待禮而相奔者也

風雨

思君子也亂世則思君子不改其度焉

子衿

刺學校廢也亂世則學校不修焉

揚之水

閔無臣也君子閔忽之無忠臣良士終以死亡而作是詩也

出其東門

閔亂也公子互爭兵革不息男女相棄民人思保其室家焉

野有蔓艸

思遇時也君之澤不下流民窮于兵革男女失時思不期而會焉

溱洧

刺亂也兵革不息男女相棄溱風大行莫之能救焉齊

鷄鳴

思賢妃也哀公荒淫怠慢故陳賢妃貞女夙夜警戒相成之道焉

還

刺荒也哀公好田獵從禽獸而無厭國人化之遂成風俗習于田獵謂之賢閑于馳逐謂之好焉

著



刺時也時不親迎也

東方之日

刺衰也君臣失道男女淫奔不能以禮化也

東方未明

刺無節也朝廷興居無節號令不時挈壺氏不能掌其職焉

南山

刺襄公也鳥獸之行淫乎其妹大夫遇是惡作詩而去之

甫田

大夫刺襄公也無禮義而求大功不修德而求諸侯志大心勞所以求者非其道也

盧令

刺荒也襄公好田獵畢弋而不修民事百姓苦之故陳古以風焉

敝笱

刺文姜也齊人惡魯桓公微弱不能防閑文姜使至淫亂爲二國患焉

載驅

齊人刺襄公也無禮義故盛其車服疾驅于通道大  
都與文姜淫播其惡于萬民焉

猗嗟

刺魯莊公也齊人傷魯莊公有威儀技藝然而不能  
以禮防閑其母失子之道人以為齊侯之子焉

魏

葛屨

刺褊也魏地陜隘其民機巧趨利其君儉嗇褊急而

無德以將之

汾沮洳

刺儉也其君儉以能勤刺不得禮也

園有桃

刺時也大夫憂其君國小而迫而儉以嗇不能用其  
民而無德教日以侵削故作是詩也

陟岵

孝子行役思念父母也國迫而數侵削役乎大國父  
母兄弟離散而作是詩也

十畝之間

刺時也言其國削小民無所居焉

伐檀

刺貪也在位貪鄙無功而受祿君子不得進仕爾

碩鼠

刺重斂也國人刺其君重斂蠶食于民不脩其政貪而畏人若大鼠也

唐

蟋蟀

刺晉僖公也儉不中禮故作是詩以閔之欲其及時以禮自虞樂也此晉也而謂之唐本其風俗憂深思遠儉而用禮乃有堯之遺風焉

山有樞

刺晉昭公也不能修道以正其國有財不能有用有鐘鼓不能以自樂有朝廷不能以酒掃政荒民散將以危亡四隣謀取其國家而不能知國人作詩以刺之

揚之水

刺晉昭公也昭公分國以封沃沃盛疆昭公微弱國

人將叛而歸沃焉

椒聊

刺晉昭公也君子見沃之盛彊能修其政知其蕃衍  
盛大子孫將有晉國焉

綢繆

刺晉亂也國亂則昏姻不得其時焉

杖杜

刺時也君不能親其宗族骨肉離散獨居而無兄弟  
將為沃所并爾

羔裘

刺時也晉人刺其在位不恤其民也

鶉羽

刺時也昭公之後大亂五世君子下從征役不得養  
其父母而作是詩也

無衣

美晉武公也武公始并晉國其大夫為之請命于大  
子之使而作是詩也

有杖之杜

刺晉武公也武公寡特兼其宗族而不求賢以自輔  
焉

葛生

刺晉獻公也好攻戰則國人多喪矣

采芩

刺晉獻公也獻公好聽讒焉

秦

車隣

美秦仲也秦仲始大有車馬禮樂侍御之好焉

駟驥

美襄公也始命有田狩之事園囿之樂焉

小戎

美襄公也備其兵甲以討西戎西戎方疆而征伐不  
休國人則矜其車甲婦人能閱其君子焉

蒹葭

刺襄公也未能用周禮將無以固其國焉

終南

戒襄公也能取周地始爲諸侯受顯服大夫美之故

作是詩以戒勸之

黃鳥

哀三良也國人刺穆公以人從死而作是詩也

晨風

刺康公也忘穆公之業始棄其賢臣焉

無衣

刺用兵也秦人刺其君好攻戰亟用兵而不與民同欲焉

渭陽

康公念母也康公之母晉獻公之女文公遭麗姬之難未反而秦姬卒穆公納文公康公時爲太子贈送文公于渭之陽念母之不見也我見舅氏如母存焉及其卽位思而作是詩也

權輿

刺康公也忘先君之舊臣與賢者有始而無終也

陳

宛丘

刺幽公也淫荒昏亂游蕩無度焉

東門之粉

疾亂也幽公淫荒風化之所行男女棄其舊業亟會於道路歌舞于市井爾

衡門

誘僖公也愿而無立志故作是詩以誘掖其君也

東門之池

刺時也疾其君之淫昏而思賢女以配君子也

東門之揚

刺時也昏姻失時男女多違親迎女猶有不至者也

墓門

刺陳佗也陳佗無良師傅以至于不義惡加于萬民焉

防有鵲巢

憂讒賊也宣公多信讒君子憂懼焉

月出

刺好色也在位不好德而說美色焉

株林

刺靈公也淫乎夏姬驅馳而往朝夕不休息焉

澤陂

刺時也言靈公君臣淫于其國男女相說憂思感傷焉

檜

羔羊

大夫以道去其君也國小而迫君不用道好潔其衣服逍遙遊燕而不能自強于政治故作是詩也

素冠

刺不能三年也

隰有萋楚

疾恣也國人疾其君之淫恣而思無情欲者也

匪風

思周道也國小政亂憂及禍難而思周道焉

曹

蟋蟀

刺奢也昭公國小而迫無法以自守好奢而任小人將無所依焉

候人



刺近小人也共公遠君子而好近小人焉

鴟鵂

刺不壹也在位無君子用心之不一也

下泉

思治也曹人疾共公侵刻下民不得其所憂而思明

王賢伯也

幽

七月

陳王業也周公遭變故陳后稷先公風化之所由致

王業之艱難也

鴟鴞

周公救亂也成王未知周公之志公乃為詩以遺王名之曰鴟鴞

東山

周公東征也周公東征三年而歸勞歸士大夫美之故作是詩也一章言其完也二章言其思也三章言其室家之望女也四章樂男女之得及時也君子之于人序其情而閔其勞所以說也說以使民民忘其

死其惟東山乎

破斧

美周公也周大夫以惡四國焉

伐柯

美周公也周大夫刺朝廷之不知也

九罭

美周公也周大夫刺朝廷之不知也

狼跋

美周公也周公攝政遠則四國流言近則王不知周

大夫美其不失其聖也

小雅

鹿鳴

燕羣臣嘉賓也既飲食之又寔幣帛筐篚以將其厚  
意然後忠臣嘉賓得盡其心矣

四牡

勞使臣之來也有功而見知則說矣

皇皇者華

君遣使臣也送之以禮樂言遠而有光華也

常棣

燕兄弟也閔管蔡之失道故作常棣焉

伐木

燕朋友故舊也自天子至于庶人未有不須友以成者親親以睦友賢不棄不遺故舊則民德歸厚矣

天保

下報上也君能下下以成其政臣能歸美以報其上焉

采芣

遣戍役也文王之時西有昆夷之患北有玁狁之難以天子之命命將率遣戍役以守衛中國故歌采芣以遣之出車以勞還杖柱以勤歸也

出車

勞還率也

杖柱

勞還役也

魚麗

美萬物盛多能備禮也文武以天保以上治內采芣

以下治外始于憂勤終于逸樂故美萬物盛多可以告于神明矣

南陔

孝子相戒以養也

白華

孝子之潔白也

華黍

時和歲豐宜黍稷也有其義而亡其辭

南有嘉魚

樂與賢也太平之君子至誠樂與賢者共之也

南山有臺

樂得賢也得賢則能爲邦家立太平之基矣

由庚

萬物得由其道也

崇丘

萬物得極其高大也

由儀

萬物得生各極其宜也有其義而亡其辭

蓼蕭

澤及四海也

湛露

天子燕諸侯也

彤弓

天子錫有功諸侯也

菁菁者莪

樂育材也君子能長育人材則天下喜樂之矣

六月

宣王北伐也鹿鳴廢則和樂缺矣四牡廢則君臣缺矣皇皇者華廢則忠信缺矣常棣廢則兄弟缺矣伐木廢則朋友缺矣天保廢則福祿缺矣采芾廢則征伐缺矣出車廢則功力缺矣杖杜廢則師衆缺矣魚麗廢則法度缺矣南陔廢則孝友缺矣白華廢則廉恥缺矣華黍廢則蓄積缺矣由庚廢則陰陽失其道理矣南有嘉魚廢則賢者不安下不得其所矣崇丘廢則萬物不遂矣南山有臺廢則爲國之基隊矣由儀廢則萬物失其道理矣蓼蕭廢則恩澤乖矣湛露

詩小序  
廢則萬國離矣彤弓廢則諸夏衰矣菁菁者莪廢則無禮儀矣小雅盡廢則四夷交侵中國微矣

采芑

宣王南征也

車攻

宣王復古也宣王能內修政事外攘夷狄復文王之境土修車馬備器械復會諸侯于東都因田獵而選車徒焉

吉日

美宣王田也能慎微接下無不自盡以奉其上焉

鴻鴈

美宣王也萬民離散不安其居而能勞來還定安集之至于矜寡無不得其所焉

庭燎

美宣王也因以箴之

沔水

規宣王也

鶴鳴

詩小序

卷

詩小序  
誨宣王也

祈父

刺宣王也

白駒

大夫刺宣王也

黃鳥

刺宣王也

我行其野

刺宣王也

期于

宣王考室也

無羊

宣王考牧也

節南山

家父刺宣王也

正月

大夫刺幽王也

十月之交

詩小序

大夫刺幽王也

雨無正

大夫刺幽王也雨自上下者也衆多如雨而非所以爲政也

小旻

大夫刺幽王也

小宛

大夫刺幽王也

小弁

刺幽王也太子之傅作焉

巧言

刺幽王也大夫傷于讒故作是詩也

何人斯

蘇公刺暴公也暴公爲卿士而譖蘇公焉故蘇公作是詩而絕之

巷伯

刺幽王也寺人傷于讒故作是詩也

蓼莪

詩小序

三



刺幽王也民人勞苦孝子不得終養爾

大東

刺亂也東國困于役而傷于財譚大夫作是詩以告病焉

四月

大夫刺幽王也在位貪殘下國構禍怨亂並興焉

北山

大夫刺幽王也役使不均已勞于從事而不得養其父母焉

無將大車

大夫悔將小人也

小明

大夫悔仕于亂世也

鼓鐘

刺幽王也

楚茨

刺幽王也政煩賦重田萊多荒饑饉降喪民卒流亡祭祀不饗故君子思古焉

詩小序

三十三

信南山

刺幽王也不能修成王之業疆理天下以奉禹功故君子思古焉

甫田

刺幽王也君子傷今而思古焉

大田

刺幽王也言矜寡不能自存焉

瞻彼洛矣

刺幽王也思古明王能爵命諸侯賞善罰惡焉

裳裳者華

刺幽王也古之仕者世祿小人在位則讒譖並進棄賢者之類絕功臣之世焉

桑扈

刺幽王也君臣上下動無禮文焉

鴛鴦

刺幽王也思古明王交于萬物有道自奉養有節焉

頍弁

諸公刺幽王也暴戾無親不能燕樂同姓親睦九族

詩小序

三十四

孤危將亡故作是詩也

車牽

大夫刺幽王也褒姒嫉妬無道並進讒巧敗國德澤不加于民周人思得賢女以配君子故作是詩也

青蠅

大夫刺幽王也

賓之初筵

衛武公刺時也幽王荒廢嬖近小人飲酒無度天下化之君臣上下沈湎淫泆武公既入而作是詩也

魚藻

刺幽王也言萬物失其性王居鎬京將不能以自樂故君子思古之武王焉

采菽

刺幽王也侮慢諸侯諸侯來朝不能錫命以禮數徵會之而無信義君子見微而思古焉

角弓

父兄刺幽王也不親九族而好讒佞骨肉相怨故作是詩也

菀柳

刺幽王也暴虐無親而刑罰不中諸侯皆不欲朝言王者之不可朝事也

都人士

周人刺衣服無常也古者長民衣服不貳從容有常以齊其民則民歸一傷今不復見古人也

采芣

刺怨曠也幽王之時多怨曠者也

黍苗

刺幽王也不能膏潤天下卿士不能行召伯之職焉

隰桑

刺幽王也小人在位君子在野思見君子盡心以事之

白華

周人刺幽后也幽王取申女以為后又得褒姒而黜申后故下國化之以妾為妻以孽代宗而王弗能治周人為之作是詩也

絲蠻

詩小序  
三十一  
微臣刺亂也大臣不用仁心遺忘微賤不肯飲食教  
載之故作是詩也

瓠葉

大夫刺幽王也上棄禮而不能行雖有牲牢饗餼不  
肯用也故思古之人不以微薄廢禮焉

漸漸之石

下國刺幽王也戎狄叛之荆舒不至乃命將率東征  
役久病于外故作是詩也

苕之華

大夫閔時也幽王之時西戎東夷交侵中國師旅並  
起因之以饑饉君子閔周室之將亡傷已逢之故作  
是詩也

何艸不黃

下國刺幽王也四夷交侵中國背叛用兵不息視民  
如禽獸君子憂之故作是詩也

大雅

文王

文王受命作周也

大明

文王有明德故天復命武王也

緜

文王之興本由太王也

棫樸

文王能官人也

旱麓

受祖也周之先祖世脩后稷公劉之業太王王季申以百福于祿焉

思齊

文王所以聖也

皇矣

美周也天監代殷莫若周周世世修德莫若文王

靈臺

民始附也文王受命而民樂其有靈德以及鳥獸昆蟲焉

下武

繼文也武王有聖德復受天命能昭先人之功焉

詩小序

三十八

文王有聲

繼代也武王能廣文王之聲卒其代功也

生民

尊祖也后稷生于姜嫄文武之功起于后稷故推以配天焉

行葦

忠厚也周家忠厚仁及艸木故能內睦九族外尊事黃耆養老乞言以成其福祿焉

既醉

太平也醉酒飽德人有士君子之行焉

鳧鷖

守成也太平之君子能持盈守成神祇祖考安樂之也

假樂

嘉成王也

公劉

召康公戒成王也成王將蒞政戒以民事美公劉之厚于民而獻是詩也

洞酌

召康公戒成王也言其皇天親有德饗有道也

卷阿

召康公戒成王也言求賢用吉士也

民勞

召穆公刺厲王也

板

凡伯刺厲王也

蕩

召穆公傷周室大壞也厲王無道天下蕩蕩無綱紀  
文章故作是詩也

抑

衛武公刺厲王也亦以自警也

桑柔

芮伯刺厲王也

雲漢

仍叔美宣王也宣王承厲王之烈內有撥亂之志遇  
裁而懼側身修行欲銷去之天下喜于王化復行百



姓見憂故作是詩也

崧高

尹吉甫美宣王也天下復平能建國親諸侯褒賞申伯焉

烝民

尹吉甫美宣王也任賢使能周室中興焉

韓奕

尹吉甫美宣王也能錫命諸侯

江漢

尹吉甫美宣王也能興衰撥亂命召公平淮夷

常武

召穆公美宣王也有常德以立武事因以為戒然

瞻卬

凡伯刺幽王大壞也

召旻

凡伯刺幽王大壞也旻閔也閔天下無如召公之臣也

周頌

清廟

祀文王也周公既成洛邑朝諸侯率以祀文王焉

維天之命

太平告文王也

維清

奏象舞也

烈文

成王即政諸侯助祭也

天作

祀先王先公也

昊天有成命

郊祀天地也

我將

祀文王於明堂也

時邁

巡守告祭柴望也

執競

祀武王也

思文

后稷配天也

臣工

諸侯助祭遣于廟也

噫嘻

春夏祈穀于上帝也

振鷺

二王之後來助祭也

豐年

秋冬報也

有瞽

始作樂而合乎祖也

潛

季冬薦魚春獻鮪也

雝

禘太祖也

載見諸侯

始見乎武王廟也

有客

微子來見祖廟也

武

奏大武也

閔子小子

嗣王朝于廟也

詩落

嗣王謀于廟也

敬之

羣臣進戒嗣王也

小毖

嗣王求助也

載芟

春藉田而祈社稷也

良耜

秋報社稷也

絲衣

繹賓尸也高子曰靈星之尸也

酌

告成大武也言能酌先祖之道以養天下也

桓

講武類禡也桓武也

賚

大封于廟也賚予也言所以錫予善人也

般

巡守而祀四岳河海也

魯頌

駟

頌僖公也僖公能遵伯禽之法儉以足用寬以愛民務農重穀放于坰野魯人尊之于是季孫行父請命于周而史克作是頌

有駟

頌僖公君臣之有道也

泮水

頌僖公能修泮宮也

闕宮

詩小序

頌僖公能復周公之宇也

商頌

那

祀成湯也微子至于戴公其間禮樂廢壞有正考甫者得商頌十二篇于周之大師以那為首

烈祖

祀中宗也

玄鳥

祀高宗也

長發

大禘也

殷武

祀高宗也

詩傳

衛端木賜子貢

周南

文王之妃妣氏思得淑女以共內職賦關雎子曰關  
 雎哀而不傷樂而不淫能正其心則無怨嫉邪辟之  
 思心正而身修身修而家齊家齊而國治國治而天  
 下平故用之鄉人用之邦國其奏樂也必歌關雎以  
 亂之所以風天下也詩之義六 一曰風二曰賦三曰  
 比四曰興五曰正六曰頌關雎兼之興以賦而為風

詩傳

一

詩傳  
之首焉是王化之本也

太姒將歸寧而賦葛藟子曰貴而能勤富而能儉疏而能孝可以觀化矣

周人美后妃之德終始婦道賦桃夭子曰宜其家人而後可以教國人見君子之修其身矣

周人慶文王之多男而賦陂斯

周人美其公子之多仁也賦麟止

文王遣使求賢而閔行役之艱也勞之以卷耳

文王得良臣于野周人美之賦兔置

南國諸侯慕文王之德而歸心于周賦樛木

受辛無道商人慕文王而歸之賦汝墳

文王化行南國男女知禮詩人美之賦廣漢

文王之時萬民和樂童兒歌謠賦采芣

召南

公子歸于諸侯國人觀焉賦鵲巢

諸侯之夫人勤于窺蠶國人美之賦采芣

諸侯之夫人終容其媵也賦江有汜

大夫貞而能儉忠乎公室國史美之賦羔羊



內子勤于祭祀國史美之賦采蘋

召公宣布主命諸侯服焉賦殷其雷

南國之大夫聘于京師睹召公而歸心焉賦草蟲

小臣奉使而勤勞于公賦小星

虞人克舉其職國史美之賦鄒虞

召南之人安於治一一時擇賦標有梅缺四字空後同

野人求昏而不能其禮女氏拒之賦野有死麋

野人強昏不得而訟女氏一一終之賦行露

召康公勤于勞民燕人懷之賦甘棠

魯

周公孫于魯殷人畔公憂王室勸王修政以備之賦

鴟鴞

周公帥師征殷三年克之勞其歸士賦東山

周公居于魯魯人觀焉賦狼跋

周公歸于周魯人欲留之弗克賦九罭

周人思周公而賦伐柯

周人一一賦破斧

僖公城楚丘以備戎史克頌之賦楚宮

僖公——賦駟

僖公獻捷于太廟史克——賦泮水

僖公——克頌之賦有駟

僖公八年始用郊禘史克——賦闕宮

邶

管未封于邶與蔡未霍未康未監殷四國害周公康  
未諫不聽三未遂以殷畔康未憂王室賦柏舟子曰  
仁矣吾於柏舟見匹夫不可奪志也

管未將畔大夫諫之賦雄雉

管未以殷畔邶人風之賦匏有苦葉

管未以殷畔仕者苦之賦北門

邶之伶東心乎王室賦東兮東伶人名

邶風危亂——民去之賦北風

——良婦棄於夫賦谷風

——寡母欲去而子自訟焉賦凱風

時不尚德——陳古以風之賦靜女

邶

三未葺周公邶人風之賦牆有茨

詩傳  
三未不義鄘人刺之賦相鼠

三未以殷畔遂伐衛鄘人從軍其妻念之賦柏兮

鄘人美其君子不仕亂邦賦考槃子曰見遯世而無  
悶矣

朋友相贈賦木瓜子曰見苞苴之禮行焉

子不孫鄘人刺之賦芄蘭

國亂民貧君子傷之賦有狐子曰見惻隱之仁焉  
女歸非禮衰而見棄刺之賦氓

衛

衛世子餘未立而卒共姜誓以守志賦柏舟

衛武公好學明德國人美之賦淇澳

武公好賢樂善國人美之賦干旄

衛莊公取于齊夫人賢而不禮焉國人閔之賦碩人

衛莊公之嬖人生州吁好兵莊姜憂之賦采芣

莊姜見怒於公賦終風

衛州吁弑其君桓公莊姜歸于齊賦日月

戴嬀歸于陳莊姜贈之于野賦燕燕

州吁求寵于諸侯使公孫文仲帥師及宋公諸侯魯

詩傳

五

詩傳  
人蔡人伐鄭衛人怨之賦擊鼓

衛宣公納伋之妻國人惡之賦親臺

宣公殺其世子伋及母弟壽衛人傷之賦二子乘舟  
宣姜不閑於禮衛人風之賦君子偕老

衛昭伯無禮於姜國人惡之賦難之賁賁

公室無禮衛人刺之賦采芣

狄入衛衛戴公次于漕許穆姬閔之賦載馳

宋桓姬閔衛之破也賦泉水

宋桓姬之媵和其小君之賦賦竹竿

宋桓姬歸于衛思襄公賦河廣

狄侵黎黎侯出奔衛衛穆公不禮焉黎人怨之賦旌  
丘

黎大夫勸其君以歸國賦式微

衛靈公召子都于宋國人譏之賦蝮蝮

王

王世子宜曰弑其君幽王自立于維尹伯封過西都  
而傷之賦黍離

荆伐申平王以周師戊申周人怨之賦錫之水

詩傳

戍者不歸室家思怨賦君子于役

平王之族流散而賦葛藟

東遷學廢君子傷之賦子衿

桓王——辛苦之賦何草不黃

周人從征賦嘽嘽之石

周人從軍室家念之賦采芣

周人行役而訊其室家賦大車

齊襄公——王周人耻之賦何彼穠矣

王棄賢大夫風之賦唐棣

留子賢而退隱周人慕之賦丘中

王好讒大夫憂之賦采芣

大夫——周人諫之賦無將大車

王好音大夫風之賦君子陽陽

民適異國——賦黃鳥

士就窺下十字皆半闕當云戚而莫之恤賦我行其埜

王室亂人不生賦君之粦

京師饑——流而怨賦中谷

萇弘忠於王晉趙鞅殺之周人傷之賦有兔

齊

齊大夫相戒以勤于公賦東方未明

襄公好田大夫風之賦盧

齊俗習於田賦營

公子小白適莒齊人慕之賦丰

魯桓公會襄公于濼遂與夫人姜氏如齊齊人刺之

賦敝笱

襄公留姜氏于齊魯桓公不能制齊人刺之賦南山

襄公伐衛姜氏會之于師齊人刺之賦載毆

魯莊公會齊大夫狩于禚齊人譏之賦猗嗟

齊桓公相管仲以匡天下齊人美之賦風雨

桓公好內衛姬箴之賦鷄鳴

莊公無禮齊人刺之賦東方之日

景公欲求諸侯大夫風之賦甫田

齊俗昏禮不窺君子譏之賦著

魏

魏之君子——美之賦伐檀

魏之君子——賦十畝之間

魏之君子訓民孝弟賦杖杜

魏人——賦陟岵

魏人憂其國——賦園有桃

魏人困於——其國賦碩鼠

魏人苦於征——賦鴇羽

魏之內子——怨之賦葛履

唐

唐——賦蟋蟀

唐侯——賦山有樞

曲沃盛——憂之賦采芣

曲沃盛疆——賦錫之水

曲沃僭弑其三關處隱隱可見蓋晉侯唐人刺之賦

無衣

晉人久於從——賦葛生

晉獻好好讒——賦采芴

晉文公好賢——賦杖杜

曰季遇卻缺于冀薦于文公——人美之賦野有艸草

晉大夫賢——美之賦羔裘

詩傳

九

晉大夫

譏之賦彼汾

晉亂民窮

傷之賦綢繆

曹

曹未振

之賦尸鳩

曹之君

賦下泉

曹

賦蜉蝣

曹

風候人

鄆

鄆

之賦羔求

鄆之君子

賦匪風

鄆人困於

賦長楚

喪亂不終

賦素冠

鄆人兄弟相棄

賦錫之水

鄆人夫婦相棄

賦大路

鄭

鄭武公養賢而賦緇衣子曰於緇衣見好賢之至也

鄭武公封弟段于京祭足諫之不聽大夫風之賦將

仲子

詩傳

十



大未段多才而好勇鄭人愛之賦未于田

段不義而得眾鄭人歸之賦大未

鄭世子忽辭昏於齊祭仲諫之賦有女同車

公子五爭齊楚交代鄭國大亂其臣謀欲諫而救之

賦籜兮

鄭文公使高克禦狄于境不召師潰大夫憂之賦清

人

鄭靈公棄其世臣而任狂狡子良憂之賦扶胥狂氏狡名

子良諫用狂狡靈公不聽將去其國賦麥秀

子良去國不忘諫君賦褰裳

鄭靈公好倡國人化子譏之賦溱洧

子皮為政忠直文武子產美之賦羔裘

夫婦相戒以勤生樂善美之賦女曰鷄鳴

鄭有貞士宜其俗賦出其東門

陳

陳賦宛丘

陳之賦衡門

陳靈公如夏氏之賦株林

孔寧儀行父從君 一 泄冶刺之賦墓門

陳靈公聽讒囚泄冶內子憂之賦防有鵲巢

陳殺其大夫泄冶 一 傷之賦澤陂

陳 一 一 賦東門之枌

陳 一 一 一 之賦東門之池

朋友 一 一 一 賦東門之楊

朋友 一 一 一 賦月出

秦

秦襄公以王命征戎周人赴之賦無衣

襄公遣大夫征戎而勞之賦小戎

襄公伐戎初命為秦伯國人榮之賦車鄰

襄公克戎始取周地秦人矜之賦終南

襄公始有田圃之事秦人喜之賦駟鐵

晉重耳入于晉秦穆公送之賦渭陽

康公葬穆公以子車氏三子殉秦人哀之賦黃鳥

君子隱于川上 一 慕之賦蒹葭

一 一 一 賦晨風

一 一 一 賦權輿

詩傳  
小正

周公制作禮樂用之燕享有小正焉——雀鳴——所  
以脩身也——鹿鳴伐木菁莪隰桑白駒皆所以燕賢  
也宮棣燕兄弟也頰鼻燕親戚也魚麗嘉魚瓠葉皆  
所以燕大臣也南山有臺天保大臣所以報王也煌  
華遣使臣也四牡勞使臣之勤也杖杜勞戍也邵風  
陳農政也南山楚茨甫田皆所以勸農也大田農夫  
所以報上也斯干落窺宮也鴻鴈懷流人也蓼蕭常  
常者芻湛露彤弓桑扈采芣皆天子之燕諸侯也瞻

彼洛矣鴛鴦魚藻皆諸侯所以報天子也子曰凡爲  
天下國家有九經脩身則道立尊賢則不惑窺窺則  
諸父昆弟不怨敬大臣則不眩體羣臣則士之報禮  
重子庶民則百姓勸來百工則財用足柔遠人則四  
方歸之懷諸侯則天下畏之斯周道之所以正乎

小正續

宣王中興而小正續焉六月北伐也出車勞將帥也  
采芾勞師也采芑南征也黍苗城申也車工吉日閱  
武也庭燎勤政也沔水念亂也無羊考牧也車牽樂

詩傳

廿三

親昏也

小正傳

昭王南賦大夫憂之賦鼓鐘

圻招賦道穆王西征祭公述民怨以諫賦圻招

懿王之賦勞于王事賦北山

王之時大夫避賦蠶

厲王信讒大夫憂之賦青蠅

厲王之時諸侯勞賦小東

厲王不禮于諸侯賦苑柳

厲王出居于蕪賦小明

尹伯奇賦後母鄰大夫閔之賦小弁

幽王賦巷伯

大夫傷于賦巧言

大賦小旻

相戒賦鳴鳩

申后賦白華

兄弟不賦角弓

皇父專政賦十月之交

思

母賦蓼莪

衛武公

賦賓之初筵

衛武

賦懿戒

賦四月

西周喪退

大夫傷之賦正月

王室播遷大

臣閔之賦雨無其極

桓公代鄭

家父諫之賦節

朋友

之賦谷風

君子懷

賦都人士

大正

周公制

會朝受

有大正焉文

王生民公劉緜大明棫櫟旱麓思齊皇矣靈臺大武

文王有聲行葦既醉鳧鷖嘉樂皆周德以訓

成王也洞酌卷阿

王也

大正續

宣王中興大正續焉雲漢

高

伯

伯也韓奕

漢平

也

大正傳

呂穆公諫

賦蕩

賦柔桑

賦民勞

賦板

賦瞻卬

賦召旻

周頌

周公

天之清思

文

廟

將

文

烈

鷺

子

時

般

武

載見

瞽合

寢廟

成

朝

朝于

之

之也

祀成王

堂

執競

成康

報

也

共闕二百三十五字

商頌

商頌五篇毛鄭韓孔呂朱錯于魯頌之後非也

宋公孫正

鄆烈祖祀成湯也長發

大禘也玄鳥

殷武祀高宗也

詩說

漢 魯人申培著

周南

關雎文王之妃太姒思得淑女以充嬪御之職而供祭祀賓客之事故作是詩首章於六義中為先比而後賦也以下二章皆賦其事而寓比興之意

葛藟此亦太姒所自作賦也

桃夭周人美后妃終始婦道之詩皆比而後賦也

蟋斯美周室多男之詩興也

詩說

八

麟止文王之子多仁賢美之皆比中有賦也

卷耳文王遣使求賢而勞之以詩首章先比而後賦也後三章皆賦也

兔置文王聞太顛闕天散宜生皆賢人而舉之國史詠其事而美之皆比而後賦也

樛木諸侯慕文王之德而歸心焉故作此詩皆比而後賦也

汝墳商人苦紂之虐歸心文王而作是詩首二章賦也末章興也

漢廣文王化行江漢而男女知禮國史美之而作是詩皆比中有賦也

采芣童兒鬪草嬉戲歌謠之詞賦也

召南

鵲巢諸侯嫁女其民觀焉卽其事而賦之也

采芣美夫人親蠶之詩賦也

江有汜諸侯之媵始不容於嫡終而進之故作是詩興也

羔羊美大夫之詩賦也

詩說

二



采蘋內子敬祀詩人賦之

殷其雷武王克商諸侯受命于周廟出就終南之館  
故作此詩皆比而後賦也

草蟲南國大夫夏聘于周次于終南睹王室之多賢  
相率以歸心焉賦也

小星小臣奉使行役之詩賦也

鄒虞美虞人之詩賦也

標有梅女父擇壻之詩興也

野麋昏嫺惡無禮之詩賦也

行露強委禽而不受至於興訟大夫以禮斷之而國  
史美之一章比也二章三章皆興也

甘棠燕人追美召公之詩賦也

魯

鴟鴞管叔及其羣弟流言于國周公避居於魯殷王  
祿父遂與十七國作亂周公憂之作此詩以貽成王  
欲王省悟以備殷全篇以鳥之育子成巢者比先王  
之創業而代之爲言也

東山周公伐武庚既克而歸勞其從行之士故作此

詩說

詩皆賦中有興焉

狼跋周公居于魯魯人睹其德容而作是詩先比而後賦也

伐柯管叔以殷圍衛大夫議迎周公乃作此詩一章全比也二章比而賦也

九罭周公歸於周魯人欲留之不可得作是詩興也破斧周公至自征殷四國美之賦也

僖公城楚丘以備戎太史克美之賦也

駟史克美僖公考牧之詩賦也

泮宮僖公作泮宮而落其成太史克頌禱之詞前三章皆賦其事以起興也下四章皆賦也

有駟燕飲而頌禱之詞興也

闕宮魯僖公新作后稷文王之廟于太廟世室及孝惠桓莊四親廟之上而史克作詩以頌之非孔子所錄也十一章皆賦也

邶

柏舟康叔因管叔欲害周公挾武庚以叛憂之而作一章興也下四章皆賦也

詩說  
四  
雄雉邶之臣諫管叔而作此一章二章皆興也三章四章皆賦也

匏有苦葉邶人刺管叔之詩一章比也二章興而比也三章四章全比也

北門邶之仕者處危國事亂君因征役而出門賦之以自嘆也

東兮伶官心乎王室而自傷之詩前三章賦也未章興也

北風邶人厭亂之詩皆比而賦也

谷風邶之良婦見棄于夫而作是詩一章比中有賦也二章賦也三章比而賦也四章比而後賦也五章六章皆賦也

凱風邶人母不安其室七子自咎而作一章二章比而賦也三章四章皆興也

靜女陳古諷今之詩賦也

鄘

牆有茨鄘人刺三監之詩興也

相鼠刺三叔之詩興也

詩苑

五

伯兮 鄘人有從武庚而伐衛者室家憂而作一章二章賦也三章比而後賦也四章賦也

考槃美隱者之詩賦也

木瓜朋友相贈之詩賦也

芄蘭刺霍叔也以童子僭成人之服比其不度德量力而助武庚作亂

有狐君子于寒夜見貧民與狐涉水而傷之賦也

氓淫婦爲人所棄鄘人述其事以刺之首二章皆賦也三四章皆興也五章賦也六章賦中有比也

### 衛

柏舟衛釐侯在位世子恭伯先卒恭姜守義齊武公欲召之歸寧而嫁之恭姜不許故作此詩興也

淇奧美衛武公之詩興也

干旄美武公好賢賦也

碩人衛莊公娶于齊曰莊姜賢而公不禮焉國人閔之而作是詩前一章賦也二章賦而比也三章賦也四章興也

綠衣衛莊公嬖人生州吁有寵而好兵莊姜憂之而

言言  
作前二章皆賦也三與四皆比而賦也

終風莊姜戒州吁公不悅姜憂而作詩四章皆比而後賦也

日月州吁弑桓公莊姜大歸而作是詩賦也

燕燕莊姜與娣戴嬀皆爲州吁所逐同出衛野而別

莊姜作詩以贈嬀焉前三章皆興也後一章賦也

擊鼓州吁伐鄭國人怨之而作賦也

窺臺衛宣公爲伋娶婦而美築親臺而自納之衛人惡之而賦其事也未章比中有賦也

二子乘舟宣公欲立少子朔使伋壽如齊而沉之于

河衛人傷之而作是詩賦也

君子偕老刺宣姜之詩賦也

離之奔奔刺宣姜與公子頑之詩興也

采芣宣姜召公子頑于公桑久處而遠送之國人刺之而作是詩興也

載馳許穆夫人閔衛之亡傷許之小力不能救恩歸唁其兄義又不得故賦是詩前二章皆賦也三章四

章皆興也

泉水宋桓夫人閔衛之破而作首興後皆賦也

竹竿宋桓夫人之勝和泉水而作首章興也二章三章先比後賦也

河廣宋桓夫人生襄公而出歸于衛襄公即位夫人思之而義不可往故作此詩賦也

旄丘狄逐黎侯黎侯寓于衛衛穆公不克納黎大夫怨之而作是詩一章興也二章三章四章賦也

式微黎侯失國而寓于衛其臣勸之歸賦也

蝦蟇衛靈公為南丁召宋朝國人譏之二章皆先比

而後賦也末章賦也

王

黍離幽王伐申申侯逆戰于戲射王弑之立平王于申自申遷洛命秦伯帥師逐犬戎于鎬京尋遣尹伯封犒秦伯之師過故宗廟宮室秦人皆墾為田成生禾黍旁皇不忍去故作此詩賦也

揚之水荆子討申侯弑幽王之罪伐申侵甫及許平王遣兵戍之周人怨思而作興也

君子于役戍申者之妻所作賦也

葛藟王族流散而作興也

子衿王室下衰學政廢弛弟子多倍其師君子傷之而作是詩賦也

何草不黃桓王之世伐滕薛唐杞諸國連歲不息周人苦之而作是詩前二章興也三章賦也未興也  
嘽嘽之石桓王伐鄭將帥不堪勞苦而作是詩賦也  
采芣周人從征其妻念之而作是詩賦也

大車周人從軍寓其室家之詩賦也

何彼穠矣齊襄公殺魯桓公莊王將平之使榮叔

桓公命因使莊公主昏以桓王之妹嫁襄公周人傷之而作是詩一章賦中有比也二章賦也三章興也  
唐棣僖王者棄賢而諷之首章興也二章三章賦也  
采葛賢者被讒見黜于野周人閔之而作興也

無將大車周大夫有窺信小人者其臣諫之而作是詩比而後賦也

君子陽陽景王好音而士遂習音君子諷之而作是詩賦也

黃鳥民適異國見拒于人而思歸故鄉乃作是詩比

而後賦也

茗之萼景王崩王室亂兵連歲饑民物盡耗君子自傷生逢其難而作是詩二章興也未章賦也

中谷民饑而流夫婦不保君子閔之而作是詩興也  
有兔趙鞅殺萇弘周人傷之而作是詩比而賦也

齊

東方未明齊大夫相戒以勸于公故作此詩前二章皆賦也未比而賦也

盧齊襄公好田君子諷之而作是詩賦也

管齊俗好田君子刺之賦也

丰襄公無道卽位之四年公弟小白避之莒齊人慕之而作是詩賦也

敝筍魯桓與大人文姜如齊而襄公通焉齊人刺之比而後賦也

南山襄公久留文姜齊人刺之比而後賦也

載毆齊襄納衛朔抗王人魯人從之文姜歸齊以犒師齊人刺之賦也

猗嗟魯莊公朝于齊遂及齊大夫狩禚齊人刺之賦



詩說  
也

風雨齊桓得管仲以爲相齊人喜之而作是詩比而後賦也

雞鳴齊衛姬勸桓公以勤政故作此詩賦也

東方之日齊莊公好女樂君子譏之賦也

甫田齊景公急於圖霸大夫諷之二章興也未比也著齊俗廢親迎之禮君子譏之賦也

魏

伐檀君子能其官而不用魏人慕之而作是詩比而

興也

十畝之間政亂國危賢者不樂仕于其朝而思與友歸于農畝賦也

杖杜君子教人孝友之詩興也

陟岵魏人行役而思其親故作此詩賦也

園有桃君子憂國而歎之故作此詩賦也

碩鼠大夫貪戾魏人怨之而作是詩比而後賦也

鴇羽民從征役而不得養其父母故作此詩興也

葛履魏之內子儉不中禮勝者怨之一章興也二章

詩說  
賦也

唐

蟋蟀唐人相戒之詩興也

山有樞唐人憂國之詩興也

菽唐昭侯封公子成師于曲沃成師治聚盛強師服憂之而作是詩比中有賦也

錫之水成師有篡國之謀唐人知之而作是詩比而後賦也

無衣唐公孫伋弑三君而取其國盡以寶器賂周

王王命之爲晉侯國人作此以刺之賦也

葛生晉獻公之時國人于於征役室家念之而作是詩二章興也後三章賦也

采苓晉人諫獻公信讒之詩賦也

杖杜晉文公好賢而國人美之興也

野有蔓草晉曰季薦郤于文公晉人美之比也

羔裘晉人美其大夫之詩興也

彼汾晉人刺其大夫之詩興也

綢繆晉亂民窮昏嫺失時君子傷之而作是詩興也

曹

尸鳩曹叔爲政有度國人美之而作是詩興也  
下泉東遷之初曹人閔周而作皆比而後賦也  
蜉蝣君怠國危曹大夫閔之而作皆比而賦也  
候人曹君多任非人國人諷之首章賦也後三章比  
也

鄆

羔求鄆君不能自強于政治國人憂之而作賦也  
匪風周室衰微賢人憂久而作賦也

萇楚鄆人困於賦役而作賦也

素冠三年之喪廢君子傷之而作賦也

鵲之水兄弟爲人所間而被讒者訴之詞比而賦也  
大路棄婦之詞賦也

鄭

緇衣鄭武公好賢賦詩貽之賦也

將仲子鄭莊公欲陷弟段授以大邑祭仲諫嚙拒之  
大夫原其情而刺之皆賦中有比也

叔于田叔段多才而好勇大夫憂之而作是詩賦也

大叔段不義而得衆大夫憂之而作是詩賦也

有女同車鄭世子忽辭昏于齊祭仲足諫之而作是詩賦也

籜兮鄭莊公卒公子爭立而齊楚交伐忠臣憂之欲相率獻謀以救其國故作此詩皆先比而後賦也  
清人鄭文公惡其大夫高克欲遠之而使禦狄于境久而不召師將潰散公子素憂之而作是詩賦也  
扶胥鄭靈公棄其世臣而任嬖人狂狡子良諫之而作是詩賦也

麥秀靈公不聽子良之諫將逐之故作是詩以責狂狡一章興也二章賦也

褰裳子良如晉作詩以寓靈公賦也

溱洧刺亂也皆賦體

羔裘鄭子皮卒子產思之追頌焉賦也

女曰雞鳴夫婦相警戒之詞賦也

出其東門鄭之貞士宜其室家不染淫俗而作此詩賦也

陳

宛丘陳人譏其大夫之詩賦也

衡門君子樂隱之詩賦也

株林陳靈公通乎夏姬國人刺之賦也

墓門泄冶諫靈公孔寧儀行父譖而囚之冶作是詩

興也

防有鵲巢泄冶被讒內子憂之而作比而後賦也

澤陂泄冶諫而死君子傷之興也

東門之枌 東門之池 東門之楊

月出朋友相期不至而作興也

秦

無衣秦襄公以王命征戎周人赴之賦也

小戎秦襄公征戎而勞其大夫之詩賦也

車鄰襄公初為諸侯周大夫與燕美之而作首章賦

也下二章比也

終南襄公初為諸侯秦人祝之而作興也

駟騶秦人從狩而作賦也

渭陽晉公子重耳歸于晉秦穆公送之而作是詩賦

也

黃鳥秦穆公卒世子瑩以三良殉之秦人傷之而作是詩興也

蕪葭君子隱于河上秦人慕之而作是詩興而比也  
晨風秦君遇賢始勤終怠賢人譏之興也

權輿則與前篇同義賦也

小正

鹿鳴天子燕賓師之歌蓋鹿鳴伐木菁莪隰桑皆燕賢者而詞有重輕敬有隆殺所謂尊賢之等也三音皆以鹿鳴起興而賦之

伐木天子燕友之歌興也

菁莪天子燕賓興之士則歌此詩比而賦也

隰桑天子燕士之詩前三章比而賦也末章賦也

白駒賢者將隱去王者留之而作是詩賦也

常棣天子燕兄弟之歌首章興也二章賦也三章至

末皆賦也

頍鳥此燕王族之詩賦中有比也

嘉魚此前二章皆賦也後二章先比而後賦也

魚麗此詩全篇皆賦也

言言  
瓠葉全篇皆賦也

以上二詩子貢傳以爲皆燕大夫臣之詩而其詞亦有墜殺焉

南山有臺大臣頌美天子之詩興也

天保大臣祝頌天子之詩賦也

煌萼天子遣使于四方歌此餞之首章興也下四章皆賦也

四牡天子勞使臣之詩首二章皆賦也三章四章皆興也末章賦也

杕杜勞還戍之詩前三章皆興也末章賦也

邠風周公陳農政之詩賦也

南山土者勸農而禱祀之詩賦也

楚茨農事既成乃祭宗廟燕及王族之詩賦也

甫田農事既成祀田祖而并犒農夫之詩賦也

大田農夫報上之詩賦也

斯干王者落其新宮史佚美之賦也

鴻鴈王者懷柔遠人流民喜之而作是詩比而賦也

蓼蕭諸侯來朝天子燕之而歌此詩興也

常常者華天子美諸侯之詩前三章興也末章賦也

湛露天子燕同姓諸侯之詩興也

彤弓諸侯敵愾獻功天子賜弓矢燕之而奏樂歌賦也

桑扈天子燕方伯之詩前二章皆興也後二章賦也采叔諸侯免喪入朝天子錫賚之詩前二章皆興也中一章賦也末章皆興也

瞻彼洛矣天子會武于洛邑諸侯美之賦也

鴛鴦諸侯祝天子之詩興也

魚藻亦諸侯美天子之詩興也

小正續

此卷十一篇皆宣王甲興之詩當時秦之燕京以續周公之正樂矣毛氏

變小正非也

六月尹吉甫帥師征獫狁史籀美之賦也

出車宣王再命南仲伐獫狁遂平西戎勞其還師史

籀美之賦也

采芣宣王之世既驅獫狁勞其還師之詩前四章皆

興也下二章皆賦也

采芣宣王命方叔征荆荆人來歸史籀美之前三章

皆興也末章賦也

黍苗宣王命召穆公往城謝以遷申伯史籀美之音



章興也下四章皆賦也

車工宣王大閱于東都諸侯畢會史籀美之賦也

吉日宣王畋獵復古史籀美之賦也

庭燎宣王勤政史籀美之賦也

沔水宣王卽位乞言于羣后而作是詩皆興也

無羊宣王考牧史籀美之賦也

車牽宣上中興士得親迎其友賀之而作此詩首章

賦也次章興也三章興也四章興也

小正傳

鐘鼓而下二十八篇蓋自昭穆至於幽平或公卿大夫諷諫于上或士君子怨

思于下亦皆出于好惡之公而得夫情性之正夫子錄之以存益或謂之傳者以其非奏樂之

正經而亦可傳也大正傳倣此

鼓鐘昭王南遊宴樂于淮水之上君子憂傷而作是

詩賦也

圻招穆王西征七萃之士咸怨祭公謀父作此詩以

諷諫賦也

北山大夫行役不得以養其父母而作是詩賦也

緜蠻大夫失位遠適它國其過賓之主人閔之而作

是詩興也

青蠅厲王之世讒言繁興君子憂之而作興也

小東東國困于役而傷于財大夫作此以告病首章賦中有比也次章賦也三章興也後四章皆賦也

苑柳厲王暴虐諸侯相戒而作興也

小明厲王流于蔬大夫之從行者歷時既久悲傷而作皆賦也

小弁尹伯奇為後母所譖而出其鄰大夫作此詩以諷其父吉甫首章至第五章皆興也六章興也七章賦中有興也八章興也

巷伯幽王之時孟子遭讒而被宮刑為寺人而作此詩前六章皆賦也末章先比而後賦也

巧言周幽王時大夫傷于讒而作是詩前三章皆賦也四章興而比也五章興也下章皆賦也

小旻大夫以王惑于邪謀不能斷以從善而作此詩賦也

鳴鳩此大夫遭周之亂而兄弟相戒以免禍之詩首章興也二章賦也此下三章皆興也

白華幽王寵褒姒廢姜后后歸申而作此詩興也

角弓王不窺九族而好讒佞宗族相怨之詩首章興也下三章皆賦也五章比也下三章皆先比而後賦也

十月之交幽王之時天變見于上地變動于下而姦臣亂政于外嬖妾敗德于內大夫憂亂亡之將至故作是詩賦也

正月周室喪亂大夫傷之而作是詩前三章皆賦也四五章賦也六章興也七章賦中有比也八章九章皆比也十章先比而後賦也十章十一章皆賦也

賓之初筵衛武公自警之詩賦也

懿戒衛武公自警兼訓國人首四章皆賦也五章賦中有興也六七章皆賦也八章賦中有比也九章興也至末三章皆賦也

四月大夫遭讒流離南國而作是詩前三章皆賦也中三章興也七章賦也末章亦興也

蓼莪王室昏亂讒邪肆行其大夫士有沒而不得其所者孝子痛傷而作是詩前三章皆先比而後賦也四章賦也五章六章皆興也

雨無其極東遷之初大夫有不忠于王室者誓御之  
臣閔之而作賦也

節桓王之時任用非人諸侯咸叛兵敗民殘家父憂  
之作此以諫王焉首二章興也下六章皆賦也

谷風朋友相怨之詩興也

都人士尹伯封作周既東遷見西周風俗之美而傷  
今之不古若賦也

大正

文上周公追述文王之德明周家所以受命而興也

者作詩歌發于清廟受釐陳戒之時以訓嗣王賦也  
生民周公制禮作樂尊后稷以配天故作此詩以推  
本其始命之祥明其受命于天者其原如此賦也  
公劉周報公劉召公述其事以訓嗣王使知民事之  
詩賦也

緜周報太王周公述其事以訓嗣王之詩首章起句  
爲比下五句皆直賦之也下七章皆賦也

棫樸周公誦歌文王之德以訓嗣王首章興也二章  
賦也三章興也四章五章皆先比而後賦也

詩說  
早麓詠嘆文王之德前三章皆興也第四章賦也五章六章皆有義之興也

思齊歌文王之德而推本言之賦也

皇矣詩敘太王太伯王季之德以及文王伐密伐崇之事賦也

靈臺文王遷都于豐作靈臺以齊七政奏辟雖周公述之以訓嗣王賦也

大明周公述文武受命之功以訓嗣王八章皆賦也文王有聲周公述文武遷都豐鎬以訓嗣王前七章

皆賦也未章興也

行葦天子祭畢而燕父兄耆老之詩首章興也下二章皆賦也

既醉王俗與燕畬行葦之詩賦也

鳧鷖祭之明日繹公尸之樂歌興也

嘉樂公尸美王者之詩賦也

洞酌召康公戒成王之詩賦也

卷阿召康公從成王遊歌于卷阿之上因王之歌作此以進戒首章總敘以發端也二章以下凡五章皆

召公陳其歌詠之辭皆賦體七八章皆興也九章即其所見賦之以寓進戒之意第十章從上鳳皇之鳴而賦之以興下章之義高岡卷阿之脊末章賦也大武康王大禘報祀成王奏大武六成既畢受釐陳戒之詩賦也

大正續

此卷六篇皆宣王時詩亦奏之會朝以續周召之大正矣毛詩列之民勞板蕩抑柔柔之後而謂之變大正非也

雲漢宣王憂旱史籀美之賦也

崧高宣王之舅申伯出封于謝尹吉甫詩以送之賦

也

采芣宣王命樊侯築城于齊尹吉甫詩以送之賦也

韓奕韓侯來朝受命將歸顯父餞之贈以是詩六章

皆賦也

江漢召穆公帥師征淮南之夷史籀美之而作是詩

賦也

常武宣王親征淮北之夷既服而歸召穆公美之賦

也

大正傳

此卷四篇皆厲王時詩二篇為幽王時詩本非用之為會朝之樂及受釐陳戒

詩說

之辭也夫子特以其文體音節之相似而傳之以示戒焉

蕩厲王無道召穆公諫之賦也

桑柔芮良夫傷厲王之失國而作是詩首章先比而後賦也二三四章皆賦也五章賦中有比也六七八章皆賦也九章興也十章賦也十一章興也十二章十三章皆興也末三章皆賦也民勞厲王之時公卿憂亂同列相戒而作此詩賦也板厲王用事之臣多懷不忠以致禍敗公卿賦此以責之賦也

瞻卬幽王嬖褒姒任奄人尹伯奇憂亂而作此詩前三章皆賦也第四章賦中有興也五章六章皆賦也末章興也

召旻幽王邇刑人近頑童諂巧用讒慝諸侯攜貳戎狄內侵饑饉因之國人流散尹伯奇諫王而作是詩前三章皆賦也四章比而賦也五章賦中有比也六章比而賦也末章賦也

頌

清廟周公成洛也奉成王見諸侯作明堂宗祀文王

詩克

二五

二四

以配昊天上帝率諸侯祀之而作此樂歌賦也

維天之命亦祭文王之詩賦也

維清亦祭文王于明堂而奏象舞之詩賦也

思文郊祀后稷以配天之樂歌賦也

天作周祭岐山配以大王文王之詩賦也

我將季秋禘上帝于明堂而配以文王之樂歌也賦

也

雖成王祀文武之詩賦也

烈文成王祭宗廟而獻助祭諸侯之樂歌賦也

振鷺先代之後助祭于周而勞之之歌興也

武大武一成之歌賦也

賚述武王大封于廟之詩為大武之二成賦也

昔邁述武王巡守而朝會祭告之樂歌蓋大武之三

成也賦也

般此述巡守之詩為大武之四成賦也

勺亦頌武王之詩蓋大武之五成賦也

桓此大武六成之歌賦也

頌



閔予小子成王免喪始朝先王之廟作詩四篇以自警皆賦也

訪落成王既朝于廟因作此詩以道延訪羣臣之意賦也

敬之成王受羣臣之戒而述其言賦也

思亦訪落之意賦也

載見此諸侯助祭于武王廟之詩賦也

有客成王既討武庚封微子啟于宋來朝于周見于祖廟此其燕樂之歌賦也

有瞽始作樂而合乎祖之詩賦也

潛薦魚于寢廟之樂歌賦也

絲衣士執事于王祭而飲以旅酬之樂歌賦也

臣工祭先農之詩賦也

豐年秋冬報賽之樂歌蓋祀田祖先農方社之屬賦也

載芟亦豐年之意賦也

良耜與載芟同意賦也

昊天有成命康王禘成王于明堂之詩賦也

詩說  
噫嘻康王孟春祈穀于東郊以成王配享之詩賦也  
執競昭王禘康王于明堂之詩賦也

商頌

邠祀成湯之樂歌賦也

烈祖與上篇同

長發大禘之詩賦也

玄鳥此亦禘祀之詩賦也

殷武祀高宗之樂蓋帝乙之世武丁親盡當禘以其  
中興功高存而不毀特新其廟稱為高宗而祀之故

作此歌賦也

詩說終



